

Ibu masuk kuliah, tinggal di asrama bantu anak OKU Jadi pelajar demi anak

Oleh HAFIZ ABBAS
mohdhaifiz.abbas@kosmo.com.my

KUANTAN – Pengorbanan seorang ibu yang sanggup menjalani kehidupan seperti pelajar semata-mata untuk membantu anaknya yang lumpuh melanjutkan pelajaran ke universiti membawa hasil lebih daripada sekadar sekeping ijazah.

Berkat kesabaran Zaidah Tamjis, 47, anaknya itu, Siti Hawa Apandi, 21, muncul antara graduan cemerlang jurusan Diploma Sains Komputer di Universiti Malaysia Pahang (UMP) dengan memperoleh Purata Gred Nilai Kumulatif (PGNK) 3.79.

Zaidah sedar Siti Hawa yang berkerusi roda kerana menghidap penyakit astrofi muskular spina (SMA) iaitu penyakit berkaitan saraf motor sejak kecil, tidak mampu menguruskan dirinya sendiri.

Siti Hawa sekadar boleh memegang nota kuliah dan buku seberat tidak melebihi 500 gram.

Bagi memastikan anaknya berjaya seperti insan normal lain, suri rumah dari Taman Mahkota, Gambang, Kuantan

itu bertekad membantu anaknya

“Selama tiga tahun saya jadi macam pelajar, duduk dengan dia di asrama, masuk dewan kuliah dan ikut sesi perbincangan dengan pelajar lain.

“Bagi orang lain ia mungkin satu beban tetapi saya tidak, lagipun sekarang saya puas sebab anak saya sudah berjaya,” kata Zaidah ketika ditemui selepas majlis konvokesyen kelima UMP yang membabitkan 1,030 graduan di sini semalam.

Pada majlis itu, Siti Hawa menerima anugerah kecemerlangan bagi kategori Orang Kelainan Upaya yang disampaikan Canselor UMP, Tengku Abdullah Sultan Ahmad Shah.

Bagi anak ketiga daripada lima beradik itu, pengorbanan ibunya menjadi kenangan sepanjang hayat dan menyuntik semangatnya untuk berjaya.

“Ijazah ini juga untuk emak. Disebabkan bantuan dia, saya boleh tumpukan perhatian untuk belajar seperti insan lain,” kata Siti Hawa yang bercita-cita menjadi pegawai teknologi maklumat.



APANDI

Kosmo (Semar) Ahad 10/10/10 ms2



RUSHDI SALLEH

ZAIDAH melihat sijil diploma Siti Hawa pada Majlis Konvokesyen Kelima UMP di Kuantan semalam.

Dia kini merupakan pelajar tahun kedua Ijazah Sarjana Muda Sains Komputer di UMP dan sama seperti masa lalu, Zaidah bersamanya di kampus.

Sementara itu, bapanya, Apandi A. Hadi, 47, berkata, sejak Siti Hawa menuntut di UMP, dia hanya mempunyai isteri pada hujung minggu apabila Zaidah pulang ke rumah pada hari Jumaat dan

kembali ke kampus pada hari Ahad.

Walaupun pada mulanya Apandi yang bekerja di sebuah syarikat swasta kekok menguruskan rumah tangga, dia reda dengan pengorbanan itu.

“Kami suami isteri sedikit pun tidak terbeban untuk menjaga Siti Hawa kerana sejak dia kecil kami memang memberi sepenuh tumpuan terhadapnya,” kata Apandi.